

## মানসম্পন্ন গ্র্যাজুয়েট তৈরি করতে হবে ॥ ঢাবি ভিসি

বিশ্ববিদ্যালয় রিপোর্টার । ঢাকা বিশ্ববিদ্যালয়ের (ঢাবি) উপাচার্য অধ্যাপক ড. মোঃ আখতারুজ্জামান বলেছেন, প্রিন্টিং এ্যান্ড পাবলিকেশন স্টাডিজ বিভাগ একটি স্বতন্ত্র বিদ্যা। এ বিভাগের পেশাদারিত্ব আছে। আমাদের গুণগত মানের সঙ্গে তাল মিলিয়ে ছাত্রছাত্রী ভর্তি করতে হবে। মানসম্পন্ন গ্র্যাজুয়েট হিসেবে তাদের তৈরি করতে হবে। মান ধরে রাখতে পারলে এ বিভাগ উদাহরণ হয়ে থাকবে। বুধবার ঢাবি প্রিন্টিং এ্যান্ড পাবলিকেশন স্টাডিজ বিভাগের নতুন দফতর উদ্বোধনী অনুষ্ঠানে তিনি এসব কথা বলেন। এ সময় উপস্থিত ছিলেন সামাজিক বিজ্ঞান অনুষদের ভারপ্রাপ্ত ডিন অধ্যাপক ড. সাদেকা হালিমসহ বিভাগের শিক্ষক ও শিক্ষার্থীবৃন্দ। অনুষ্ঠানে স্বাগত বক্তব্য দেন বিভাগের চেয়ারম্যান সুধাংশু শেখর রায়। তিনি বলেন, বাংলাদেশে প্রিন্টিং এ্যান্ড পাবলিকেশনের ওপর কোন প্রোগ্রাম চালু নেই। অথচ বিশ্বের প্রায় ৫০০ বিশ্ববিদ্যালয়ে এ বিষয়ের ওপর কোর্স চালু আছে। এমনকি পাশের দেশে ভারতেও আছে। সে হিসেবে ঢাকা বিশ্ববিদ্যালয়ে এ বিভাগের নতুন দফতর উদ্বোধন একটি মাইলফলক বলা যেতে পারে। উল্লেখ্য, ২০১৫ সালের অক্টোবরে প্রিন্টিং এ্যান্ড পাবলিকেশন স্টাডিজ বিভাগ চালু হয়।